

Irurtzun-Andoain autobidea

Iritzi desberdinak alderdien artean akordioa ezagutu ondoren

EA eta EE aurka azaldu ziren, EAJ eta PSOEk berriz posibletzat jo zuten

Alderdi politikok iritzi desberdinak adierazi dituzte Eli Galdosek eta Lurraldeak proposatutako trazaketa berriaren aurrean. EA eta EEk, azken honek indar gutxigoz, kritikatu egin dute beren ustez «Diputazioaren iritzi aldaketa» izan dena. PSOE eta EAJk aukerak ikusten dizkiote proposatutako aldaketari.

DONOSTIA

Claudio Saizar EAKo batzarkide taldearen bozeramaleak erabaki larritzat jo zuten Galdosek eta Lurraldeko ordezkariak lortutako akordioa. «Errekonozitu behar da ETAk baldintzatzen dituela guztion borondatearen erabakiak» esan zuen Saizarrek. HBren partaidetza azpimarratu zuen EAKo buruak, «HBk adarra jo digu azken sei urteotan. Sei urte eta lauzpabost hilabete izan direnez, adar jotzea askoz handiagoa da».

«Orain ulertzen dut Galdosek inbestiduran esandakoa, Xabier Albisturrek autobideaz zer uste zuen galdetu zionean. Galdosek esan zuen trazatua ez zuela ondo ezagutzen eta aldatua izan zitekeela. Hurrengo egunean, noski, trazatua ezin zela aldatu eta onena zela esan zuen. Ardanzak duela gutxi esan zuen, Diputazioak diseinatutako trazatua egingo zela. Roman Sodupek ingeniariari bisita egin zionean berdin esan zuen. Nik ulertzen ez dudana zera da, zer esango duten orain eskua galdu zuen eskoltak aldaketaren aurrean».

EAK alderdiaren barnean aztertu behar ditu orain trazatuaren aldaketaren arrazoi tekniko eta politikoak, azken erabakia hartu aurretik.

«Orain egin duguna informazioa biltzea da. Organo konpetenteak bilduko dira azken erabakia hartu aurretik».

«Oso erabaki serioa da» Ajuria-Eneako hitzarmena haustea Claudio Saizarren ustez. «Guk ez dugu jokoa jarriko Paktutik aterako garen edo ez, beste alderdi batzuek hauteskunde aurretik jokatzeko egon ziren bezala.» Ajuria Eneako hitzarmenari buruzko edozein erabaki exekutiba nazionalak hartu behar du EAKo bozeramalearen esanetan.

EE: «ERAKUNDEEK ERABAKI BEHAR» Patxi Baztarrikak

EEko bozeramaleak «Diputazioaren jarrera aldaketa» azpimarratu zuen. Edukia eta forma bereizi zituen Baztarrikak, «edukiari dagokionez, gu ados gaude aste honetan Ardanza lehendakariak egindako adierazpenekin». Baztarrikak dira EEkoaren ustez «autobidea eta edozein gaiaren inguruan eztabaidatzeko eta erabakitzeko markoa».

«Formari dagokionez, astelehen honetatik gaur arte jarrera aldatu da autobidearen aurkako koordinadorearekiko. Bere garaian, alderdi demokratikoak ukatu egin ginen koordinadorearekin hitzegitera ETaren biolentziatik argi eta garbi bereizi arte, ETAk gatazkan sartzea gaitzesen ez zuten bitartean. Une honetan bi bilera egin dira koordinadorearekin gai honi buruz hitzegin eta eztabaidatzeko. Jarrera aldaketa egon da.»

Kontsentsuaren aldeko deia egin zuen Baztarrikak. «Kontsentsu demokratikoa kostata lortu zen. Gizartea bera kontsentsuarekin bat etorri zen Donostiako manifestazio jendetsuan isladatu zen bezala. Alderdi

demokratikok ezin dugu kontsentsu hori arriskuan jarri».

ARAXESETIK LEITZARANERA PASATZEA Martin Elizegi


EAJko bozeramalearen esanetan iritzi aldaketa Lurraldeko koordinadorearen eskutik etorri da. «Oso garrantzitsua da Lurraldeko koordinadora Araxesetik Leitzaranera pasatzea, aurretik EE egin zuen moduan».

«Aldaketak oraingo proiektuaren % 40 ukituko duela ari gara hitzeginen, ez da proiektu berria».

Adostasuna zabaltzea zen EAJren helburua Elizegiren esanetan. «Kasu honetan kontsentsu hitzak berebiziko garrantzia du. Bilatzen ari garena dagoen kontsentsua handitzea da, hau lortzen bada pozik sentituko gara». Erabakia batzarkide taldean eztabaidatu eta ondoren alderdiara eramango du EAJk azken erabakia hartzeko Elizegik adierazi zuenez.

Ana Urtxuegia talde sozialistaren eledunak ere adostasuna ez haustearen deia egin zuen. Galdos eta Lurraldeak egindako akordioa «baloratu behar dugu, atentatu eta hilketa gehiago ez daudela esanahi badu behintzat».

«Alderdiaren exekutiba biltzen denean emango dugu gure eritzia gai honi buruz. Orainarteko proiektuaren aldeko bloke demokratikoa zegoen, gu beste proiektuaren aldekoak ginen, baina ulertzen genuenez elementu distorsionatzaileak zeudela, beharrezkoa ikusten genuen alderdi demokratiko guztiak proiektu ofiziala bultzatzea. Orain zenbait proposamen berri egiten dira eta guk aztertu behar ditugu. Guretzat garrantzitsua da kontsentsua ez haustea» azaldu zuen Lasarteko alkateak.



Autobidearen lan eremua Berastegi aldean.

C. VILLAGRAN

Oliveri: «Trazaketa aldatu da 'Artapalok' exigitzen zuelako»

DONOSTIA

Gipuzkoako Diputazioa eta Lurraldeak lortutako adostasuna gogor kritikatu zuen alderdia Eusko Alkartasuna izan zen, hain zuzen ere, aurreko legegintzaldian Diputazioaren agintea bere esku zuen alderdiak. Oliverik atzo bertan adierazi zuenez, trazaketa aldatzeko akordioa «ETaren aurrean amore ematea da».

Are gehiago, Nafarroa eta Gipuzkoa arteko autobidearen proiektu ofiziala, Oliveriren esanetan, «ez da aldatu autobidea hobetzeko, baizik eta 'Artapalok' exigitzen zuelako».

Agiri baten bidez, Oliverik honako hau esan zuen: EAJk Eli Galdosi babesa ematen baldin badio «Francisco Mujika Garmendia euskal po-

litikagintzaren buru jarriko du, ETAk hiltzen jarraitzen ez dezan neurrikerik onena bailitzan».

«Galdosek gehiengoaren printzipioa eta herri ordezkariaren hautsi egin ditu —gehitu zuen— eta ez dakigu hemendik aurrera 'Artapaloren' borondateak baldintzatuta egongo diren, zeini kontsultatu beharko zaion non, nola eta noiz hartu behar diren Diputazioaren erabakiak».

EAKo idazkari nagusiaren ustez, Gipuzkoako diputatu nagusia «ETaren txantaiaren aurrean makurtu egin da eta trazaketa txarrago bat onartu du». Lurraldearekin lortutako adostasunak «deslegitimitzen» du Eli Galdos diputatu nagusi gisa, Oliveriren iritziz.

Nafar Gobernuak Batzar Nagusien erabakiak errespetatuko ditu

IRUNEA

Nafarroako Gobernuaren iritziz, «Gipuzkoako Diputazioak eta Lurraldeko koordinadoreak autobidearen inguruan iritsitako akordioak ez du Nafarroako zatian inolako eraginik». Prentsara bidalitako agirian esaten denez, Nafar Gobernuak ez du oraindik akordioaren testu osoa ezagutzen. «Hartutako erabakiak ez du Gipuzkoa eta Nafarroako autobide zatiak elkartzen diren puntuaren trazaketan aldaketarik suposatzen»,

Iruñeko Gobernuaren esanetan.

Prentsa oharren amaieran adierazten denez, «Nafarroako Gobernuak gai honen inguruan Gipuzkoako Batzar Nagusiek hartu dezaketen erabaki guztiak errespetatzeko asmoa du».

Lurraldeko koordinakundeak gogoratu zuen atzo adostasunerako bi proposamena egin dizkiola Nafarroako Gobernuari, bata Irurtzun eta Lekunberri arteko zatiari buruz eta bestea Bi Ahizpetako pasabideari buruz.



Joan den legegintzaldiko batzarkide taldeetako bozeramaleak lehen harria jarri zutenean.

C. VILLAGRAN